

UPM anjur persidangan pengajaran

KEMENTERIAN Pengajian Tinggi, Universiti Putra Malaysia (UPM) serta Majlis Ketua Pusat Pengajaran dan Pembelajaran Institut Pengajian Tinggi Awam (IPTA) bekerjasama menganjurkan Persidangan Pengajaran dan Pembelajaran Peringkat IPT 2007, pada 12 hingga 14 Disember ini.

Antara objektif persidangan julung kali diadakan itu ialah meningkatkan kualiti modal insan yang menyumbang kepada pencapaian misi pembangunan ke arah itu.

Pengarah Pusat Pembangunan Akademik, UPM, Prof Madya Dr Sidek Ab Aziz, berkata bertemakan *Ke Arah Peningkatan Kualiti Modal Insan*, persidangan itu juga adalah usaha ke arah menyuburkan langkah penambahbaikan sistem pengajaran dan pembelajaran secara menyeluruh di IPT.

Langkah itu katanya, memenuhi teras kedua Misi Nasional 2006-2020 yang menggariskan iltizam kerajaan meningkatkan keupayaan pengetahuan, kreativiti dan inovasi negara serta memupuk minda kelas pertama.

"Kumpulan sasaran adalah di kalangan ahli akademik dan pihak terbabit dalam proses pembelajaran dan pengajaran, pegawai kerajaan dan swasta, badan bukan kerajaan, usahawan industri pendidikan dan pelajar IPT.

"Penganjuran persidangan adalah komitmen UPM dalam menyahut seruan kerajaan dengan melaksanakan usaha menambahbaik sistem pengajaran dan pembelajaran secara menyeluruh di peringkat universiti dan kebangsaan.

"Secara tidak langsung ia memberi peluang ahli akademik berkongsi idea, inovasi dan perkembangan terkini dalam pengajaran dan pembelajaran serta mewujudkan jalinan antara akademik dan industri," katanya kepada *Berita Harian*, semalam.

15 SEPT. 2007

BERITA HARIAN

89